

ANG SANTOS NGA MISA

Awit sa Pagtigum

Pari: Sa ngalan sa Amahan ug sa Anák ug sa Espiritu Santo.

Tawo: Amen.

Pari: Ang grasya sa atong Ginoong Hesukristo ug ang gugma sa Dios ug ang panaghiusa sa Espiritu Santo maanaa kaninyo.

Tawo: maanaa usab kanimo.

Pari: Mga igsoon, maghinulsul kitá sa atong mga sala, aron maandam kitá alang sa pagsaulog sa santos nga misa.

Tawo: Nagakumpisal akó sa Dios nga makagagahum sa tanán ug kaninyo, mga igsoon nga nakalapas akó ug daku uyamut sa hunáhunâ, sa pulong, sa buhat ug sa walâ pagbuhat sa kinahangláng buhaton. Kay akong sala, akong sala, akong dakung sala. Busa nangamuyo akó kang Santa Maria kanunay'ng ulay sa tanáng mga anghél ug mga santos ug kaninyo, mga igsoon, aron inyo akong i-ampo sa Ginoo nga atong Dios.

Pari: Kaloy-an unta kitá sa Dios nga makagagahum sa tanán, ug pasayloon sa atong mga sala. Dad-on unta kitá niya ngadto sa kinabuhing dayon. **Tawo:** Amen.

Pari: Ginoo, kaloy-i kami. **Tawo:** Ginoo, kaloy-i kami.

Pari: Kristo, kaloy-i kami. **Tawo:** Kristo, kaloy-i kami.

Pari: Ginoo, kaloy-i kami. **Tawo:** Ginoo, kaloy-i kami.

Pari: Himaya sa Dios

Tawo: Didto sa langit ug kadait sa iyang mga tawo dinhi sa yuta. Ginoong Dios, langitnong hari, Dios Amahan makagagahum sa tanán. Nagasimba kami kanimo. Nagapasalamat kami kanimo, nagadayeg kami kanimo tungod sa imong himaya. Ginoong Hesukristo, bugtong Anak sa amahan, Ginoong Dios, Kordero sa Dios. Ikaw nagawagtang sa sala sa kalibutan, kaloy-i kami. Ikaw nagalingkod sa tuo sa Amahan, dawata ang among pangamuyo. Kay ikáw lamang ang santos, ikáw lamang ang Ginoo, ikáw lamang ang labing halangdon, O Hesukristo, uban sa Espiritu Santo diha sa himaya sa Dios amahan. Amen.

Pag-ampo sa Katilingban

Pari: Mag-ampo kitá ... **Tawo:** Amen.

LITURHIYA SA PULONG

Unang Pagbasa

Lektor: Pagbasa kinutlo gikan sa ...
Ang pulong sa Ginoo.

Tawo: Salamat sa Dios.

Salmo Responsorio

Ikaduháng Pagbasa

Lektor: Pagbasa kinutlo gikan sa ...
Ang pulong sa Ginoo.

Tawo: Salamat sa Dios.

Aleluya

Ebanghelyo

Pari: Ang Ginoo maanaa kaninyo. **Tawo:** Maanaa usab kanimo.

Pari: Ang santos nga ebanghelyo sumala ni San N.

Tawo: Himayaon ikáw, O Ginoo.

Pari: Ang ebanghelyo sa Ginoo. **Tawo:** Daygon ikáw, O Kristo.

Homiliya

Pagpadayag sa Pag-tuo

Tawo: Nagatuo kami sa dios, ang Amahan, ang makagagahum sa tanán, magbubuhat sa langit ug yuta. Nagatuo kami kang Hesukristo, ang iyang butong Anák, atong Ginoo. Gipanamkon siya sa lalang sa Espiritu Santo ug natawo gikan ni Maria nga ulay. Nag-antus siya sa sugo ni Poncio Pilato, gilansang sa krus, namatay ug gilubong. Miaoto siya sa mga nangamatay. Sa ikatulóng adlaw nabanhaw siya. Misaka siya sa langit, ug nagalingkód sa tuó sa Dios, ang Amahan, ang makagagahum sa tanán. Mobalik siya aron paghukom sa mga buhi ug sa mga minatay. Nagatuo kami sa Espiritu Santo, sa santos ug katoliko nga simbahan, sa panag-ambit sa mga santos, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Pangamuyo sa Katilingban

Pari: Ingon ug mga igsoon, ambitan ta ang atong mga pangamuyo, alang sa mga kinahanglanon sa tanáng mga tawo. Mag-ampo kita:

Tawo: Patalinghugi, nangamuyo kami kanimo.
(mga pangamuyo sa katilingban)

Pari: Mag-ampo kitá ... **Tawo:** Amen.

LITURHIYA SA EUKARISTIYA

Awit sa Paghalad

Pari: Daygon ikáw, Ginoong Dios sa tanáng kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga pan sa kinabuhi alang kanamo.

Tawo: Daygon ang Dios hangtud sa kahangturan.

Pari: Daygon ikáw, Ginoong Dios sa tanáng kalibutan, kay gikan sa imong Kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanimo.

Tawo: Daygon ang Dios hangtud sa kahangturan.

Pari: Mga igsoon, pag-ampo kamo aron ang akó ug ang inyong sakripisyo dawaton unta sa Dios nga Amahan makagagahum sa tanán.

Tawo: Dawaton unta sa Ginoo ang sakripisyo gikan sa imong mga kamot: alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga simbahan.

Pag-ampo sa mga Gasa

Pari: Mag-ampo kitá ... **Tawo:** Amen.

Pag-ampo sa Eukaristia II

Pari: Ang Ginoo maanaa kaninyo. **Tawo:** Maanaa usab kanimo.

Pari: Ibayaw ang inyong mga kasing-kasing.

Tawo: Amo nang gibayaw ngadto sa Ginoo.

Pari: Magpasalamat kitá sa atong Ginoong Dios.

Tawo: Angay ug matarung.

Pari: Santos nga Amahan, Dios nga tunhay ug makagagahum sa tanán, angay ug matarong gayud nga magpasalamat kami kanimo, kanunay ug sa tanáng dapit pinaagi ni Hesukristo, imong hinigugmang Anák. Siya mao ang pulong. Pinaagi kaniya imong gibuhat ang kalibutan. Siya nahimong may lawas sa gahum sa Espiritu Santo ug nahimong tawo gikan ni Maria nga ulay.

Tungod kanamo midupa siya sa krus, aron pagbuntog sa kamatayon, ug pagpadayag sa pagkabanhaw. Sa ingon gituman niya ang imong pagbuot ug gipanag-iya niya ang usa ka balaang katawhan alang kanimo. Ug busa uban sa mga anghel ug mga santos nagaawit kami sa imong himaya sa usa ka tingog sa pag-ingon:

Tawo: Santos, santos, santos, Ginoong Dios sa kagahuman. Puno ang langit ug yuta sa imong himaya. Osana sa kahitas-an. Daygon ang nagaanhi sa ngalan sa Ginoo. Osana sa Kahitas-an.

Pari: Santos gayud ikáw, O Ginoo, ang tuburan sa tanáng kasantos. Ipadala ang imong espiritu, aron pagsantos niining mga gasa aron mahimo kini alang kanamo nga lawas ug + dugo ni Hesukristo among Ginoo.

Sa pagpasakit sa iyang kaugalingon, mikuha siya ug pan, mipasalamat kanimo, mipikas ug mihatag niini ngadto sa iyang mga tinun-an ug miingon:

Dawata kini ninyo nga tanán ug kan-a kay kini mao ang akong lawas nga itugyan alang kaninyo.

Sa samang paagi, tapos ang panihapon, mikuha siya sa kalis, mipasalamat kanimo pag-usab mihatag niini ngadto sa iyang mga tinun-an ug miingon:

Dawata kini ug panginom kamo nga tanán gikan niini kay kini mao ang kalis sa akong dugo, sa bag-o ug tunhay nga kasabutan, ang dugo nga iula alang kaninyo ug alang sa tanáng mga tawo, aron ang mga sala mapasaylo. Buhata kini aron paghandom kanako.

Kini ang misterio sa pagtuo.

Tawo: Si Kristo namatay, si Kristo nabanhaw, si Kristo mobalik nganhi.

Pari: Aron paghandom sa kamatayon ug pagkabanhaw ni Hesukristo nagahalad kami kanimo, Amahan, niining pan sa kinabuhi ug kalis

sa kaluwasan: Nagapasalamat kami kanimo tungod kay imo kaming giisip nga angayan nga moatubang ug moalagad kanimo. Himoa nga kami nga mangalawat sa lawas ug dugo ni Kristo magkahiusa sa Espiritu Santo.

Hinumdomi, Ginoo ang imong simbahan sa tibuok kalibutan, himoa nga mahingpit kami diha sa gugma, uban ni Benito among papa, ni N., among obispo ug sa tanang mga pari.

Hinumdumi usab ang among mga igsoon nga nangamatay, malaumon nga mabanhaw sila, ug ang tanang nangamatay diha sa imong kaluoy. Dad-a silang tanan sa pagsud-ong sa kahayag sa imong nawong. Kaloy-i kaming tanan: himoa kaming angayan nga makaambit sa kinabuhing tunhay uban ni Maria, ang inahan nga ulay sa Dios, uban sa mga apostoles ug sa tanan nga mga santos nga nagatuman sa imong kabubut-on latas sa katuigan. Uban kanila amo ikaw nga daygon, ug amo ikaw nga himayaon pinaagi ni Hesukristo, imong Anak.

Pinaagi kaniya, uban kaniya ug diha kaniya gihatag nganha kanimo, makagagahum nga Amahan, diha sa kahiusa sa Espiritu Santo ang tanang dungog ug himaya hangtud sa kahangturan.

Tawo: Amen.

Rito sa Pangalawat

Pari: Karon mag-ampo kita sa Amahan. Atong gamiton ang mga pulong nga gitudlo kanato sa atong manunubos.

Tawo: Amahan namo, nga anaa sa mga langit, pagdaygon ang imong ngalan, umabut kanamo ang imong gingharian, Matuman ang imong pagbuot dinhi sa yuta, maingon sa langit. Ang kalan-on namo sa matag adlaw ihatag kanamo karong adlaw, ug pasaylo kami sa among mga sala, ingon nga naga-pasaylo kami sa mga nakasala kanamo ug ayaw itugot nga mahulog kami sa panulay, hinonoa luwasa kami sa dautan.

Pari: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kaluoy, mahalikay kami kanunay sa sala, ug mahilayo sa tanang kasamok, Samtang nagapaabut kami nga malaumon sa pagbalik ni Hesukristo, among manunubos.

Tawo: Kay imo man ang gingharian, ug ang gahum ug ang himaya hangtud sa kahangturan.

Pari: Ginoong Hesukristo, nag-ingon ka sa imong mga apostoles: "Ang kalinaw ibilin ko kaninyo, ang akong kalinaw ihatag ko kaninyo." ayaw tagda ang among mga sala, kondili ang pagsalig sa imong simbahan; ug sibo sa imong kabubut-on hatagi kami sa imong kalinaw ug kahiusa. Ikaw nga nagapuyo ug nagahari hangtud sa kahangturan. **Tawo:** Amen.

Pari: Ang kalinaw sa Ginoo sa kanunay maanaa kaninyo.
Tawo: Maanaa usab kanimo.

Pari: Ipakitá ta ang pag-ingsoonay. (Panagdait sa usag-usa)

Pagpikas sa Pan

Kordero sa Dios nga nagawagtang sa mga sala sa kalibutan, kaloy-i kami. (2x)

Kordero sa Dios nga nagawagtang sa mga sala sa kalibutan, hatagi kami sa kalinaw.

Pari: Kini mao ang Kordero sa Dios nga nagawagtang sa mga sala sa kalibutan : bulahan ang gidapit alang sa bangkite sa Ginoo.

Tawo: Ginoo, dili akó angay nga mokalawat kanimo, apan ipamulong lamang ug mamaayo ako.

Awit sa Pangalawat

Pari: Ang lawas ni Kristo **Tawo:** Amen.

Pag-ampo human sa Pangalawat

Pari: Mag-ampo kita ... **Tawo:** Amen.

Katapusang Pag-ampo

Pari: Ang Ginoo maanaa kaninyo.
Tawo: Maanaa usab kanimo.

Pari: Manalangin kaninyo ang Dios nga makagagahum sa tanan: Amahan, ug Anak + ug Espiritu Santo. **Tawo:** Amen.

Pari: Tapus na ang misa. Dad-a ang kalinaw ni Kristo.
Tawo: Salamat sa Dios.

Katapusang Awit sa Pagdayeg

www.magsimba.com | Filipino. Liturhiya.